



Broj/Број: 01,2-50-1-2-34/06
Sarajevo/Сарајево: 7.3. 2006.

ZAPISNIK

34. sjednice Komisije za vanjske poslove

Sjednica je održana 6.3.2006., s početkom u 14,30 sati.

Sjednici su prisustvovali sljedeći članovi Komisije: Martin Raguž, Izet Hadžić, Vinko Zorić i Mehmed Žilić.

Odsutni su bili: Milorad Živković, Sead Avdić, Nenad Mišić, Jelina Đurković i Azra Hadžiahmetović.

Sjednici su prisustvovali i pozvani gosti, predstavnik Ministarstva vanjskih poslova BiH, Zoran Perković, pomoćnik ministra, predstavnik Ministarstva pravde BiH, Nikola Sladoje, pomoćnik ministra, te predstavnica Ministarstva finansija i trezora BiH, Beita Delić, šef Odjeljenja za financijske aranžmane ovog Ministarstva.

Zapisnik je vodila Merdžana Iglica, sekretar Komisije i studenti-stažisti: Edina Harbinja i Vezira Jabučar.

Kako za održavanje sjednice nije bilo kvoruma, a pozvani gosti iz resornih ministarstava se odazvali pozivu da daju pojašnjenja vezana za međunarodne sporazume i ugovore predviđene dnevnim redom, predsjedavajući Komisije Martin Raguž predložio je da se od predviđenog dnevnog reda, kako slijedi:

1. Usvajanje Zapisnika 33. sjednice Komisije za vanjske poslove Zastupničkog doma Parlamentarne skupštine BiH, održane 14.2.2006.godine;
2. Razmatranje „Aide-memoirea“ grčke veleposlanice u BiH o tzv. Ciparskom pitanju, kao i informacije iz Ministarstva vanjskih poslova BiH o ovoj temi;
3. Razmatranje informacije iz Veleposlanstva Islamske Republike Pakistan o solidarnosti Pakistana s Kašmirom;
4. Razmatranje najnovije Rezolucije Europskog parlamenta o BiH od 16.2.2006. i Rezolucije o Srebrenici od 7.7.2005.;
5. Informacija o posjetu Komiteta za odnose Parlamenta s javnošću Skupštine Zapadnoeuropske unije 22.-24.3.2006. godine;
6. Davanje suglasnosti za ratificiranje:
 - a) Protokola 14. uz Konvenciju o zaštiti ljudskih prava i temeljnih sloboda, koji se odnosi na dopunu sustava za kontrolu Konvencije, Strasbourg 13.5.2004. godine;
 - b) Ugovora o zajmu –*Regionalni projekt željeznica* između Bosne i Hercegovine i Europske banke za obnovu i razvoj;
 - c) Ugovora o zajmu između Bosne i Hercegovine i Europske investicijske banke – *Nacionalna cesta Banja Luka-Gradiška*;
 - d) Ugovora između Bosne i Hercegovine i Republike Makedonije o pravnoj pomoći u građanskim i kaznenim stvarima;
 - e) Memoranduma o sporazumu između Vijeća ministara Bosne i Hercegovine i Vlade Republike Slovenije o proširenju donirane pomoći Bosni i Hercegovini u 2001.godini.
7. Tekuća pitanja,

Komisija odredi samo prema tački 6. Ovaj prijedlog jednoglasno je prihvaćen.

Ad. 6. U vezi sa Protokolom 14. uz Konvenciju o zaštiti ljudskih prava i temeljnih sloboda, koji se odnosi na dopunu sustava za kontrolu Konvencije, g. Zoran Perković, pomoćnik ministra vanjskih poslova BiH, istakao je da za ovaj ugovor nije potrebno dodatno pojašnjenje obzirom da se radi o postprijemnoj obvezi BiH prema Vijeću Europe, te da su članovi Komisije i sami svjesni značaja ovog Protokola. G. Raguž je zahvalio g. Perkoviću, te sugerirao prisutnim članovima Komisije da se izjasne povodom ovog ugovora. Prisutni članovi su se jednoglasno pozitivno odredili spram davanja prethodne suglasnosti za ovaj ugovor, nakon čega je predsjedatelj naglasio da će Komisija osigurati da se i ostali članovi izjasne pozitivno.

Potom je gđa Beita Delić, šef Odjeljenja za financijske aranžmane Ministarstva financija i trezora BiH, upoznala Komisiju s karakteristikama Ugovora o zajmu – *Regionalni projekt željeznica* između Bosne i Hercegovine i Europske banke za obnovu i razvoj. Prema njenim riječima, sredstva iz ovog aranžmana, 70 miliona eura, namijenjena su pomoći kod saniranja željeznica FBiH i RS, i to u dijelu pruge koji prati koridor 5C. Ova sredstva čine veći dio sredstava potrebnih za cijeli projekat, za čiju je realizaciju potrebno ukupno 93 miliona eura, pri čemu će se ostatak sredstava obezbijediti iz granta Evropske banke za obnovu i razvoj te iz budžeta entiteta. Rok otplate kredita je 12 godina uz grejs period od 4 godine. G. Raguž je naglasio da se ovdje radi o značajnom i prioritetnom projektu, te da bi Komisija trebala dati svoju prethodnu suglasnost. G. Hadžić je potom postavio pitanje o realnosti vraćanja sredstava iz kredita od strane željeznica BiH s obzirom na upitnost njihovog ekonomskog opstanka i revitalizacije. Gđa. Delić je, odgovarajući na pitanje, rekla da će, ukoliko željeznice BiH ne budu u mogućnosti vratiti kredit, sredstva vratiti entiteti. G. Hadžić je upozorio članove Komisije da postoji mogućnost da se ova sredstva pozajme bez jasne vizije iskorištavanja, pri čemu se BiH samo stvaraju dodatna kredina zaduženja. Gđa. Delić je na ovo pitanje odgovorila da je cilj ovog projekta unapređenje željezničke infrastrukture, posebno putničkog željezničkog saobraćaja, kako bi se željeznice komercijalizirale. G. Raguž je, napominjući da je pitanje g. Hadžića na mjestu, upozorio Komisiju na stanje željeznica BiH, koje predstavlja i jedan od limita ekonomskom razvoju zemlje, te da BiH mora ući u nužnu rekonstrukciju željeznica. G. Hadžić je zatim ukazao na potrebu da se od Vijeća ministara zatraži blagovremeno dostavljanje inicijativa za kreditna zaduženja, kako bi ih Komisija mogla razmotriti, čime se uloga Komisije ne bi svela na formalnost. G. Raguž je pozdravio ovu inicijativu i predložio da ovo bude i jedan od zaključaka Komisije, te zamolio gđu. Delić da predloži najbolji način za dobijanje ovog plana. Gđa. Delić je odgovarajući na pitanje, rekla kako se plan može jednostavno dobiti, da ga ona sama posjeduje, ali da je on podložan promjenama, zavisno od inicijativa Vijeća ministara i zajmodavaca. G. Raguž je zaključio da je potrebno pribaviti plan kreditnih aranžmana BiH do sljedeće sjednice, kako bi se on uvrstio u dnevni red i razmotrio. Zatim je ponovno istakao značaj rekonstrukcije željeznica BiH i sugerirao Komisiji da da prehodnu suglasnost, uz naknadno konsultiranje ostalih članova Komisije.

Nakon toga se prešlo na sljedeći sporazum, Ugovor o zajmu između Bosne i Hercegovine i Europske investicijske banke – *Nacionalna cesta Banja Luka-Gradiška*. Gđa. Delić je, ukratko upoznavajući članove Komisije s ugovorom, istakla da je ovaj ugovor dio jedinstvenog projekta izgradnje zaobilaznice oko Sarajeva i puta Banja Luka – Gradiška, koji vrijedi ukupno 130 miliona eura. Europska investicijska banka će obezbijediti 65 miliona eura, Europska banka za obnovu i razvoj će kontribuirati sa 30,1 miliona eura, italijanski grant iznosi 0,4 miliona eura, a domaća kontribucija projektu je 34,5 miliona eura. Sredstva iz ovog ugovora bit će iskorištena za rekonstrukciju puta Banja Luka – Gradiška, izgradnju mosta preko rijeke Save te za obnovu graničnog prijelaza. Rok otplate ovog kredita je 25 godina, uz grejs period od 6 godina. Kamatna stopa će, prema riječima gđe. Delić, biti fiksna i varijabilna, zavisno od tržišnih uvjeta.

G. Raguž je nakon toga postavio pitanje o statusu izgradnje prstena oko Mostara. Gđa Delić je odgovorila da ta inicijativa postoji i da su pregovori o ovom projektu u toku. G. Hadžić je zatim postavio pitanje o tome ko postavlja prioritete ovih prijekata, na što je gđa. Delić odgovorila da je to Vijeće ministara. G. Raguž je zahvalio gđi Delić na velikom broju veoma korisnih informacija, predlažući potom zaključak da se od Vijeća ministara BiH i konkretno od Ministarstva prometa i komunikacija BiH zatraže detaljnija pojašnjenja o cjelokupnom toku projekta. G. Raguž je, osim toga, zadužio i sekretara Komisije, da pribavi plan prioriternih projekata Vijeća ministara u ovoj godini, kako bi se taj plan razmotrio na sjednici Komisije i uvrstio u Godišnji plan rada Komisije, što je bio prijedlog G. Hadžića.

U vezi s Ugovorom između Bosne i Hercegovine i Republike Makedonije o pravnoj pomoći u građanskim i kaznenim stvarima, g. Sladoje, pomoćnik ministra pravde BiH, upoznao je Komisiju s činjenicom da se u ovom slučaju radi o uobičajenom, standardiziranom ugovoru iz ove oblasti, nakon kojeg će uslijediti i ugovori o ekstradiciji i izvršenju stranih sudskih odluka u krivičnim stvarima s Republikom Makedonijom. Naglasio je da je BiH dosad već potpisala ovakve ugovore sa nekim od susjednih zemalja i zemalja u regionu. Komisija je dala prethodnu suglasnost i za ovaj ugovor, uz obvezu pribavljanja pozitivnog izjašnjenja i ostalih njenih članova.

Kako sjednici nije prisustvovao predstavnik pozvanog Ministarstva trgovine i ekonomskih odnosa, g. Perković iz MVP-a BiH je dao kratko pojašnjenje Komisiji u vezi s Memorandumom o sporazumu između Vijeća ministara Bosne i Hercegovine i Vlade Republike Slovenije o proširenju donirane pomoći Bosni i Hercegovini u 2001. godini. G. Perković je naglasio da je ovaj sporazum čekao na ratifikaciju pune dvije godine, te da je to bilo bespotrebno obzirom da se radi o vrlo kratkom i jasnom sporazumu. Odgovornost za kašnjenje, prema njegovim riječima, snosi Ministarstvo trgovine i ekonomskih odnosa BiH. Iz ovih razloga se Ministarstvo vanjskih poslova BiH obratilo ministarstvima BiH sa sugestijom da se izvrši ažuriranje sporazuma i ugovora, te da se, ukoliko ne postoje politički razlozi koji bi to spriječili, svi sporazumi iz prethodne dvije godine puste u proceduru za ratificiranje. Što se tiče ovog Memoranduma, g. Perković je upozorio na činjenicu da se ovdje radi o sporazumu koji nema politički karakter, te da bi Komisija trebala dati prethodnu suglasnost. G. Raguž je zatim obavijestio članove Komisije o održanom sastanku Kolegija ZD PSBiH s novoimenovanom veleposlanicom Slovenije. Tom prilikom g. Raguž je prenio raspoloženje parlamentaraca PS BiH veleposlanici o bilateralnim odnosima dviju zemalja, a posebno u vezi s obvezama Slovenije prema građanima BiH, deviznim štedišama u nekadašnjoj Ljubljanskoj banci. Naglasio da će ovo pitanje biti ozbiljnije razmotreno u PSBiH u narednom periodu. Komisija je i za ovaj sporazum dala prethodnu suglasnost uz obvezu pribavljanja pozitivnog izjašnjenja od strane ostalih članova Komisije.

Sjednica je završena u 15,00 sati.

Predsjedatelj Komisije
Martin Raguž

Zapisnik sa 34. sjednice Komisije sačinile:

Merdžana Iglica, sekretar Komisije
Edina Harbinja, student - stažista

Kopija: MVP-u BiH